

四庫全書

集部

欽定四庫全書

集部

文忠集卷

五十九至  
六十一

詳校官庶吉士<sub>臣</sub>李傳熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>黃嵩齡

欽定四庫全書

文忠集卷五十九

平園續稿十九

宋 周必大 撰

記二

太和縣仰山二王行祠記

聖人成人切矣既撫之以仁又惠之以政尚慮天降之災人為或弗能給則致力於上下神祇周禮太祝掌六祈是也至小祝復載其目曰祈福祥順豐年逆時雨寧

風旱彌災兵遠罪戾況民之所願欲尚有出於此者乎  
自釋教盛於中國故又即佛廬而致禱焉蓋神能變化  
無方佛能攝受有情其為道雖不同精誠可格則均若  
乃聰明正直廣大慈悲兼而有之惟袁州孚惠廟二王  
為然王兄弟皆龍也自晉永嘉宅仰山之獺潭至唐會  
昌三年蓋五百餘載有僧號小釋迦名惠寂者來自柳  
州卜庵此山二王欽其道行施山為寺而徙廟堵田今  
寺以太平興國為名其上廟基存焉治平元年郡人李

觀嘗為記刻石神之歸心釋氏固已昭然而巫祝恃牲  
牢以為利流膏割鮮神或厭之迨元祐六年住山佛印  
禪師了元卜於神曰血祭乎蔬食乎神曰蔬食哉厭後  
謁廟者遂以伊蒲塞為饌張丞相商英適漕本路又為  
之記功利及物逐日以新自士庶達於郡邑或繪事於  
家或塑像僧舍或祔享別廟祈求者不絕吉州太和縣  
進士劉千齡謂非設行祠不足以揭虔安靈乃即縣西  
北五里登科岡背陰面陽創正殿三間鄉人爭附益之

夾以廊廡各十二楹前為門三後為寢室七至於崇釋  
教祀徐璠與夫樂樓享亭下暨廚庫罔不具備始事於  
慶元丁巳之正月落成於戊午之十月嚴翼輪奐觀者  
起敬知縣事卓洵頌歲請禱曰雨曰暘其應如響千齡  
介予故人曾寅亮謁文記之惟皇上帝分命山川之神  
各主一方捍災禦患載於經傳不可誣已然諸侯所祭  
不過境內今二王以神龍有截之威合大雄無邊之力  
自袁徧於江西自江西放乎嶺表咸被其賜而祭享之

夫豈泛泛神祠加惠一方者所可比哉按唐藍谷神名  
在祀典而依悟真精舍詩人美之曰若歲有水旱詔使  
脩蘋繁以地清淨故獻奠無輦羶願借是詩代享神迎  
送之詞至於封爵之崇事實之衆圖志具在此不復云  
六年十一月五日

袁州宜春臺享惠新祠記

袁恃孚惠二王為司命郡以宜春臺為勝境壯亭榭於  
林木之表山川城郭俯視無遺輟燕遊以奉神敞則改

為者太守徇邦人之志也按仰山距城七十里而遠二王既敬釋氏遜山與寺徙廟堵田距城三十里而近人猶患不得朝夕致敬也故凡水旱疾疫迎神臺上以便祈禳已事乃歸其來久矣建炎中劇盜金兵繼至守奉像設而駐師焉賊薄城若有禦之者最後望見二神黃衣白馬往來雉堞間駭異而走紹興初始即臺立行祠淳熙甲午易亭為殿又移慈濟院於臺西奉惠寂禪師即神所敬者初寂歸老韶州將謝世神往訣別問豈無



見屬乎寂曰吾師靈祐禪師以正月八日逝於瀋山宜  
就是日普設僧供神敬諾自後及期則貯饗幽贊緇素  
咸聚歲以為常既遷城中齊會滋盛遠人四集凌虛創  
閣以待有衆慶元己未九月丁未融風為災一夕俱燼  
士民謹曰此飛簷架空之咎也爭輦土石培展臺基首  
營正殿五間後列瀄仰二禪師暨王之父子又為堂以  
識參請設亭以脩拜享別造齋閣於新址搃用錢八百  
餘萬郡守李訖捐金穀倡之闔境爭趨和之武經郎趙

伯詩鄉貢進士袁簡及孟公震掌其事兵馬監押趙善  
湊董其役揆日於是年十月明年四月訖工因故人潘  
侃來求記予聞靜者為性動者為情性無有不善情則  
隨物應焉大而天地明而為人寂滅者佛變化者神雖  
曰殊塗然而仁民愛物之性善善惡惡之情未嘗不均  
今二王既弭災捍患加惠斯民民亦秉懿好德思媚神  
靈故是役也富者輸財壯者効勤自求多福用潰於成  
得非道一而已如吾儒所云者乎咨爾袁人治情以禮

養性以仁以稱天地神佛之心以還比屋可封之淳豈  
惟袁人四方其訓之五月旦

廬陵縣重脩縣學記

聽訟理財根柢於縣令綱領於郡守人舉知之至於化  
民成俗守猶不敢專任況令乎此後世之通患而非古  
也三代盛時黨有庠遂有序州有長縣有正德行道藝  
以時書之當春秋世其制已廢吾夫子憂之平居每語  
其高弟曰君子學道則愛人小人學道則易使也其後

言偃宰武城果用弦歌而治夫君子學道固也小人亦與焉非縣令化民成俗之要歟更秦涉漢古制滋亡董仲舒獨能知之其言曰王者治天下以教化為大務立太學教於國設庠序化於邑又曰縣令民之師帥所謂教訓之官以德善化民者夫論庠序教訓而及於邑自夫子而後仲舒一人而已惜乎時君莫之能行迨本朝仁宗慶厯中始詔諸縣皆立學高宗中興申命於紹興十四年之春三代盛舉一旦遂復廬陵分治郡城多士

所聚而縣庠介於官寺通衢之間無地可展知縣事羅  
列雖竭力應詔然規模未脩春秋僅嘗釋奠後率附於  
州將六十年今令宣教郎豫章黃疇若攝勇懷強容困  
抑姦待人以忠行已以潔得子路治蒲之政百里既安  
歲事仍豐首創祭器躬率諸生行上丁禮次嚴像設尊  
殿廡新啓戟斡階渠高其閤閤增舊三尺起嘉泰改元  
正月壬戌告成於四月己丑凡用工三千靡金錢三十  
萬學租舊六百斛養士不盈四十益以禪居院闕戶田

一頃為租六十斛然後歲計不乏而又精於問學勤於  
教導禮文師範兩得其宜於是職事許凌等求文為之  
記按唐循吏韋景駿傳神龍中嘗令肥鄉後為趙州長  
史道出舊治民爭奉酒食迎犒有小兒亦在中景駿曰  
兒曹未生而吾去邑何故來對曰耆老言學廬館舍皆  
公所治意公古人幸親見之屬聞公府交薦黃君即仕  
於朝他日持節典藩道或由此父老子弟必將迎勞如  
景駿僕雖耄矣倘見之乎是月甲午

分寧縣學山谷祠堂記

嘉泰元年秋奉議郎臨江徐筠孟堅宰分寧暮年笑專  
儒術飾吏事每詣校官必進諸生以學顧視山谷先生  
祠宇在講堂之左陋隘朽弊亟廣而新之傳像家廟惟  
肖釋奠暇食則擇族老能文者營呈祀事屬予識其成  
參考圖牒自唐正元十五年分武寧八鄉以名茲邑西  
有幕阜山其高千丈廣袤百二十里脩水北來東南經  
縣治凡六百餘里下入彭蠡此山川之最勝者也黃氏

本金華人先生六世祖瞻嘗為邑宰厥後奉親卜居沒則就葬歷三世家修水上宦學有聲而先生出焉此世家之可考者也夫惟山川炳靈世美交濟故其孝友之行迨配古人瓌偉之文妙絕當世又得眉山蘓文忠公而師之陳張晁秦而友之是宜光顯於朝共振斯道乃或不然初坐眉山唱酬棲遲縣鎮後被史禍竄謫兩川晚以非辜長流嶺南遂隕其命中間翱翔館殿纔六年耳右史之拜復為韓川沮止其生不遇如此蓋人定勝



天也高宗中興恨不同時追贈直龍圖閣擢從弟叔敖  
為八坐寘甥徐俯於兩府皆以先生之故宸奎天縱至  
下取其筆法戒石刻銘徧於守令之庭李杜已遠遂主  
詩社身後光榮乃至於此非天定人勝耶昔孔子在魯  
魯人指為東家丘歷聘諸侯伐木削迹無所不有孰知  
後世郡邑通祀南面巍然一履之微猶藏武庫聖人尚  
爾先生其奚憾予既書其大畧又系以辭使遇祀事而  
歌焉其詞曰嗟先生之致身何艱難而險阻猗先生之

沒世乃發揚而普誦歸高山與景行極幽遐而爭覩微  
岌岌乎當時詎煌煌以終古久配祭其鄉社俶奉嘗於  
新宇釀脩水以為醪釣鰭魚而實俎擷白芽於雙井采  
浮甌之花乳尚來燕以來寧永範模乎故土九月十日

玉和堂記

春為青陽夏為朱明秋為白藏冬為玄英四氣和謂之  
玉燭此格言也今夫佳花美木在天壤間氣和而後生  
人皆知春時為然不知和氣所鍾無時無花也老叟既

闢敞廬東為平園園西北隅隙地坦然乃距北垣五十  
弓餘二肘為堂三間南直唐虞二典閣皆為流盃亭其  
深四丈二尺博三大七尺崇二丈有奇敞扉而涼塞向  
而燠可以納四時之和氣散植紅梅辛夷桃李梨杏海  
棠茶蘼紫荊丁香冠以牡丹芍藥此春景也前後兩沼  
碧蓮叢生東則紅芰彌望榴花萱草雜寘其間此夏景  
也巖桂拒霜橘柚蘭菊盛於秋江梅瑞香山茶水仙盛  
於冬時花畧備矣至如佛桑躑躅山丹素馨未利之屬

或盛或檻榮則列之悴則徹之而種植未歇也始造於  
慶元庚申十月戊辰八月丁未與客落其成共惟聖主  
在上衆賢和於朝萬物和於野遂使皞然一吏得佚老  
於和氣之內故榜其堂曰玉和志幸會云時嘉泰元年  
也

敬齋記

紹興庚午秋予與永新周正寬平一同預貢籍知其素  
慕王文正公之賢植三槐於庭築堂臨之厥後終於迪

功卽監衡獄廟蓄德積善數遺嗣人其子尤字才卿卽  
堂之陰架屋十楹廣二十尺榜曰敬齋致小雅必恭敬  
止之義自為說數百言大畧謂人之事天地事鬼神事  
父兄罔不莊敬及處閑居或尊臨卑貴待賤未免安肆  
尤實懼焉願參前以自警夫惟存心如此義方之訓可  
知嘉泰辛酉仲子圭復以妙齡舉於鄉父子過予叙宗  
盟陳世契且求一言予告之曰六經辭雖多而指甚要  
故中庸禮儀三百威儀三千而漢儒所記以曲禮為首

篇以毋不敬為首句此所謂禮之本也本立則禮無不行亦猶詩三百而夫子蔽以思無邪之三語也尚何隱顯高下之別哉請歸刻之石臘月庚寅

太和縣龍洲書院記

西昌下臨潁江陳霸先入援梁室駐軍有龍躍之瑞事見南史本朝開基之明年南唐知制誥徐鉉作白鶴觀記謂江水北湊而東匯龍洲南峙而重複以是名洲蓋亦久矣又有天桂一峰屹然其外勝槩殆冠茲邑初即

縣治之東築光華館以待過客已而遷驛快閣遂為權酌之地今宰宣教郎趙汝暮決科為政綽有父風至而歎曰天地之氣聚為山川山川之秀人實鍾之況父老相傳洲過邑庭魁出豈以趨襲之故易弦歌之樂耶乃起嘉泰元年七月徹而新之疊石為基創屋二十楹列左右生齋曰哀然曰卓爾自堂及門端正顯敞下逮庖湍各得其所閱兩月工已訖告遂做潭之嶽麓衡之石鼓南康軍之白鹿榜曰龍洲書院擇春秋補試前列者十

人居之而主以庠長於是縣學長諭貢士陳暕周有德  
學賓陸本謁予以記或曰縣有學者此非贅乎予曰三  
代盛時自王畿達於六鄉六遂為學者二為序十二為  
庠三百諸侯三鄉三遂庠當半之家塾猶未論也太和  
子男邦也畧考圖籍浮屠之居百區老子之宮亦十五  
區而額存屋廢者不預焉昔歐陽文忠公著本論謂三  
代之民不從事田畝則從事禮樂不在其家則在庠序  
是以王者之政明聖人之教行雖有佛老無自而入今



也昔之庠序皆轉而為寺觀何不疑於彼而反疑於此也幸賢令為之主盟使諸生得藏脩游息於斯未仕則由六經而探賾聖人之教既仕則推所蘊以發明王者之政復古之功權輿於茲豈但科舉得江山之助而已二年六月既望

吉州通判廳記

郡丞秦官惟掌兵馬自漢迄唐其名不常曰別駕曰司馬曰治中曰長史雖均號上佐其實從事之長耳故

緹油屏軾下與主簿同賜而州牧或得辟置間以處王  
子及近臣左降若起廢者其於政事罕嘗與聞邦國不  
空之謠宜其寥寥也藝祖皇帝創業之四年繼五代擾  
攘藩鎮跋扈兵強民弱治少亂多之後首置諸州通判  
不動聲色於朝廷之上而興利除害功徧天下是冬又  
詔凡公事非守倅僉議連書勿行規模宏遠豈歷代明  
君賢臣思慮所能及嗚呼盛哉吉大州也其為貳則在  
唐顏魯公以謫至本朝向文簡公以德選其他名賢炳

炳相望嘉泰二年五月朝請大夫開封鄭臨實來適二千石缺併綰郡組其家世之盛仕學之優施於有政見謂明敏初升聽事則支傾圯朽懼將壓焉竹木瓦甍幸儲庭下君問緩故則曰卜未利也君曰覆壓之不虞陰陽之是拘其可乎是月庚申亟僦工葺事七月乙巳落成拓題名記示某曰公大父秦國公以宣和七年春居是官嘗行州事踰四考乃得代士民懷德固請家焉舊廳載新是宜為記某追思始能言侍親於祖父母之側

今七十有五年蕙燕楚之城社致桑梓之恭敬安敢以  
老諄荒唐為解抑嘗讀衛詩美文公營宮室曰得其時制  
百姓悅之今君思一日之葺破拘攣之議得其時也用  
成材仍舊貫加顯敞焉其東故有風月軒又闢西偏以  
相映帶得其制也自是入儀天朝遺後人以安俾之交  
修郡政惠此千里仰稱藝祖設官之美意其本立矣因  
土木之工而紀歲月某請事其末云是年十月五日

汀州長汀縣社壇記

載艾春祈社稷良邦秋報也由都城達於郡邑古今一  
揆故壇壝有制牲幣有數黼黻備物酌獻以時守令躬  
行具存成憲粵自釋老教行神祠亦增雕墻峻宇殆徧  
城郭一遇水旱官吏奔走祈禳之不暇於是五土五稷  
之壇誕寘遐僻寂寞之地頽垣敗壁蒲博所聚荒榛蔓  
草牛羊踐焉二仲時至昉加葺葺例委行事於掾佐牲  
瘠酒酸簋簠弗虔姑應有司之文過是蕪廢如初承議  
郎天台謝周卿來治長汀首致志焉自邑徂壇崎嶇沮

如往來病之乃為相攸以直易迂甃為通衢二里而近  
繚以長垣總四十有三丈東為社壇宗五尺五寸廣丈  
有八尺附風師壇於其傍西為稷壇制與社等雷雨二  
壇對峙其側前闢門屋三間後創齋廬亦如之庀工以  
嘉泰二年閏臘之望閱月告成不遠千里以記為請予  
聞子路使子羔為費宰曰有民人焉有社稷焉是固然  
矣繼以何必讀書然後為學夫子亟黜其言今君自大  
父以儒登科臨民有聲肆其先公克紹世美致位二府

君復傳父祖之學為長於斯推仁心濟敏政治人事神  
蓋兩得之故書以告後之人毋俾或壞三年三月辛巳

終慕堂記

元祐名相忠肅劉公之曾孫諱荀字子卿博學篤志切  
問近思平居隆師親友著書累數萬言從宦則考古證  
今見諸行事故小試理財錢流地上出守邊南北形勝  
盡在目中而於立朝事君講之尤詳向使得位與時庶  
續先烈仕止二千石士大夫共惜之其子新長林簿無

愧既葬君清江之新城復取大孝終身慕父母之語揭  
名塚舍之堂屢求一言或疑孟子章指為舜事親設非  
追遠也予謂不然祭義因文王事死如事生反覆論孝  
子之祭而其末曰立愛自親始又曰孝以事親順以聽  
命是則人子慕親何間存沒故經云生事愛敬死事哀  
戚生民之本盡矣死生之義脩矣孝子之事親終矣嘉  
泰三年三月

文忠集卷五十九



欽定四庫全書

文忠集卷六十

平園續稿二十

宋周必大撰

記三

碑附

吉州錄參廳題名記

諸州錄事參軍於今為從八品掌郡獄及軍資市令之政實曹掾之首富沙陳希黯以名父之子繼登儒科來官廬陵謂職有崇卑題名不可無記乃起高宗中興距

今七十有八年得姓名二十七人求予一言將刻之石  
夫才有能否其時之事聲實顯晦後乃見之希黯用志  
亦遠矣予聞曹參在齊治道清靜比其去猶以毋擾獄  
市屬後人督郵有司也清靜何居乎予請著其說假令  
罪在甲乙枝蔓丙丁擾也科抑賈區強之貳價亦擾也  
惟毋縱故犯毋妄取舍使吏杜姦貪人安其業始可與  
言齊相之意矣嘉泰三年四月望

敬思亭記

嘉泰三年三月乙酉登仕郎太和蕭知節母夫人詹氏  
以疾終享年六十六卜十月丙午葬本縣高行鄉龍角  
之原知節泣而請曰先人諱導不幸早世吾母素知書  
既廢力教知節以學劬躬立門戶輕財重義撫育宗族  
凡知節得出入公卿之門皆母教也今罔極之恩不可  
報矣築亭塚舍取祭義生則敬養死則敬享思終身弗  
辱之訓榜曰敬思願賜語以寵綏之子聞夫子論要道  
至德一本於敬是以孝子之祭其立其進其薦其徹悉

以敬為主反是則為固為疏為不愛為敖為忘本可謂  
詳矣及子張乃一言以蔽之曰祭思敬蓋平居得於夫  
子者如此予尚何云九月辛巳

筠州樂善書院記

舜命夔典樂首教胄子周大司樂治學政專合國之子  
弟是時公卿大夫多出宗姓崇德象賢率於此乎取之  
本朝至道元年以近屬繁衍初置學官於是教授之名  
立迨咸平遠祥符南宮北宅復置侍教十歲已上並令

肄業治平初增小學教授十有二員此命名分職大畧也舊制七歲入小學能誦孝經論語升大學又能誦兩經善書札宗正以聞熙寧元祐並勅諸院立小學八歲至十四者歲檢舉焉是時厥後其制益詳此進德脩業次序也南渡以來抗越首置諸王宮大小學教授西外南外並立宗學人知為善之樂以蕩陵德者鮮矣今高安郡守王淹文正公旦六世諸孫也追惟文正被遇章聖徧歷要近與聞有才之本末思原德意不墜先烈乃

與貳車玉牒希宰議即郡庠之側創樂善書院外設重  
門東西兩廡廡各三齋中為講堂三間列直舍於後廡  
庖器用脩焉庀工嘉泰三年之季夏訖工於孟冬先下  
尊屬司選宗子幼而未命者以二十人為額既望帥郡  
僚延處六齋齋各有名擇老成之士訓以經史教官總  
其課程別立一齋待不率教者市田千畝用足歲計屬  
某記之嘗聞闕睢基王者之化其應見於麟趾雖繫周  
公實美文王其在大雅曰肆成人有德小子有造古之

人無數譽髦斯士是又甚言文王遐不作人一視親疎  
可以傳無窮施罔極也共惟祖宗作成宗英越二百年  
聖王在御推廣家法公族振振髦士峨峨將同符於文  
王筠州復能助宣聖化無愧民之師帥是皆宜書故樂  
為之記明年正月既望

杜氏潛光堂記

大畜之象曰剛健篤實輝光日新其德洛誥曰惟公德  
明光於上下蓋德有小大光亦隨之其積在身其發在

人士固有幽潛如韓退之所云者故四明理掾杜君諱  
袞字伯稱是也世居越之上虞以篤行著君苦心嗜學  
銳意事功紹興末北征條要務謁府帥湯岐公後帥史  
魏公二公大奇之交薦於朝再命以官嘗尉崇安力變  
不舉子之俗治獄至無一夫之冤遇大利害密裨其長  
罷行之陰德不可計妻張氏處為孝女嫁為孝婦相與  
力教諸子思恭既擢第餘皆蹈義向方見推鄉評厥後  
合葬考妣於縣之葛仙鄉寶謨閣待制陸務觀為銘思



恭復即塋築堂務觀以潛光名之求記於予往者杜正獻公越人也歐陽子誌其墓曰春秋諸侯歷秦漢千有餘歲不絕世譜而唐盛時公卿家法杜氏獨存今務觀謂君本同譜牒中間失其次序為可惜也雖然左氏叙陳敬仲光遠而自它有耀又曰非此其身在其子孫惟君德充而實浮不耀其章幸哉有子疊疊乎儒猷孜孜乎義方自宜立身揚名顯前人之光何待退之而後發亦豈必遠耀於他邦乎茲為肯堂也大矣嘉泰四年二

月望

筠州判官廳記

國家以民之休戚政之臧否寄二千石其設官有亞有旅亞者倅也位逼未免於嫌意不盡者多矣掾曹旅也分職以治各司其局而已若乃事無不預而非逼職未嘗分而情通惟幕職為然筠州判官王牒彦璋南夫弟兄競爽同取科第以嘉泰壬戌七月實來持身正涖事明一郡嘉賴官廨在麗譙內蓋尚書郎趙不遜茂中營

造於紹興之庚午踰五十年敝當改為前政周景南經始而不克至是太守王淹伯奮既給竹木又出羨錢四十五萬米百斛俾南夫易而新之相其地形深纔十餘丈博則加倍乃列堂與廳並南向廳為三間其後分東西二齋榜曰壺天者禮部侍郎倪思正甫吏隱時所題也堂為五間深明雅潔不侈不陋介於二者有古鄉堂茂中為叢桂設也稍東面西有尚綱堂南夫所創也九月庀工閱月而成予愛李觀元賓記常州判官袁師德

廳謂前軒翬飛竹欄鳳食蓋由郡守韋公遇袁以善袁  
報韋以誠遂躋堂茲今筠守甚賢損費不吝幕下又賢  
居之也安善遇誠報賓主兩得惠政加乎千里豈有既  
乎姑徇其請為之記四年甲子二月望

台州仙居縣學記

孔堂高弟猶分四科性與天道未嘗輕言世之學者乃  
欲德行言語政事文學兼而有之其不可得而聞者每  
求於議論之間往往名是實非言出而躬不逮此今昔

通惠也古靈先生陳公諱襄字述古福州侯官人時方以雕篆為學獨與陳烈周希孟鄭穆倡道海濱鄉人化之號四先生皇祐中令台州之仙居篤意學校首為文勸人讀書次諭以禮義之俗又擇明經之士朝夕講說詢問大義間習程試高不躡等卑不流俗示之以方期造於道而進取亦在其中士民懷之奉祠今百五十餘年嘉泰辛酉通直郎四明林岳來治茲邑欣慕前哲凡庠序堂廡門觀舉新之殿初祠宇卑下遷置中門之右

極其嚴潔刻公遺文二十五卷得謝雨詩於斷碑增置  
集中學有射圃淪棄榛莽亦加葺葺別市民居創觀德  
亭總為錢二千百緡皆節用籍賦田十八畝輟務場餘  
財月萬錢以贍給生員請尉籍嘉禾錢撫專主教導於  
是學職林宓呂咸陳穎不遠二千里以記為請夫教人  
必以聖人為師古靈學夫子者也林君希古靈者也學  
者誠能各因其材孜孜弗怠尊所聞而行所知豈特無  
負賢令亦將無負先聖可不勉歟按國史古靈傳惟載

其宰河陽典數郡所至必務學校而令仙居則畧之是尤不可以不書也四年甲子四月望

廣昌縣學記

盱江析臨川而為軍廣昌又析南豐而為邑其地極江西界接於閩疆秀民為多初立學在縣獄之右紹興十七年令承敷徙置學南郡丞劉喈為之記後五十餘年當嘉泰二年四月奉議郎曹進之來為宰謁先聖殿上漏旁穿兩廡歌側且非其地邑士胡巖老請改築於縣

治之東止戈亭舊基諸生相攸僉謀為允於是進士揭  
英之子儼子儀三人輸財効力主其事而黃作舟作礪  
首捐錢四十萬為之助士胥和之庀工癸亥之夏甲子  
春新學成培卑為高以避水潦雙溪夾流匯為大江面  
對羣峰宛如畫圖高明堅壯他邑鮮比進之子門生也  
求記勤甚予聞有學校之教有學校之文昔夫子折衷  
六藝自虞至周凡學校之教之文散於詩書禮樂中故  
論語不復問答惟告門弟子曰入則孝出則弟謹而信



汎愛衆而親仁教在其中矣行有餘力則以學文文在其中矣本朝開設學校復帝王之盛雖碩儒名卿布於中外而士之月書季考惟在舉業故時文無慮三變始因唐舊專用詞賦或曰雕篆無益也於是經義行焉專門一律又以為病而大學中庸之說出時論愈高行之愈難為師儒者既用此為去取士亦以此應之殆非國家孜孜求賢之本意也上方會其有極歸其有極士當是訓是行一變而至於道以副教育則所謂文將不勝

其用矣於科舉乎何有進之衡州耒陽人淳熙辛丑登  
科既視事金芝產廨中嘉禾生於野為政亦可知矣四  
年五月日

撫州學記

晉唐以來撫守多名臣至本朝則儒宗鉅公相繼而生  
學校之盛固不待言歲久或散散又圖新理也雖然羣  
守主盟為易教官任責也難慶元二年豫章胡君元衡  
來臨師席文風既振復懷永圖乃大議葺治造學糧廩

錢百二十萬太守陳侯研首捐千緡常平使者王君容  
及後守魯侯楷各助十之三漕憲繼之總錢又百三十  
萬米不在焉以六月中寅興工明年八月訖事凡大成  
殿御書閣講堂倉廩皆飾其舊內外門墻廊廡及正錄  
職事之位東西序之六齋文昌之軒庖湍之所悉鼎新  
之或請記其成太守曰教官力也弗許教官曰二千石  
功也當書會入官上庠亦復不果今數年矣先日學政  
鄉貢進士嚴滋以書遺某前不求文教官謙也歲月雖

久公論故存敢敬以請昔孟子論傳道之序由堯舜至湯文皆五百餘歲由文王至孔子適及其期故曰文王既沒文不在茲乎蓋自任也惜乎無時無位不得見諸行事退脩六藝以傳萬世今學者幸居學校讀六藝之書旦旦而來望數仞之牆盍興及肩之嘆既升其堂盍想聞金石絲竹之音仰之彌高鑽之彌堅瞻之在前忽焉在後又當希顏子若孔之卓夫如是晝而思之夜復思之則於道也其庶幾乎壘池文祥姑存故事足矣嘉

泰四年六月

廬陵縣學三忠堂記

文章天下之公器萬世不可得而私也節義天下之大閑萬世不可得而踰也吉為江西上郡自皇朝逮今二百餘年魚是二者得三公焉歐陽公脩以六經粹然之文崇雅黜浮儒術復明遂以忠言直道輔佐三朝士大夫翕然尊之天子從而謚曰文忠莫不以為然南渡搶攘右相杜充擁衆北叛金陵守陳邦光就降惟通判楊邦

又戟手罵賊視死如歸國勢凜凜士大夫翕然尊之天子從而褒贈之賜謚曰忠襄則又莫不以為然時宰議禮衆論詢詢為一編脩官胡銓毅然上書乞斬相關北使三綱五常賴以不墜士大夫復翕然尊之厥後天子從而褒贈賜以忠簡之謚則又莫不以為然是之謂三忠雖然此邦非無宰相如劉沆冲之在朝嘗力薦文忠留置翰苑又引富文忠公弼共政今姓名著在勲臣之令而謚則未聞子瑾孫僎俱為待制迄不能請矧被遇

之從臣乎夫然後知節以壹惠天子猶不敢專亦必士  
大夫翕然尊之乃可得耳廬陵宰趙汝厦即縣庠立三  
忠祠歲時率諸生祀焉巍巍堂堂衮服有章揭日月而  
行學者固仰其煒煌若夫百世之下聞清風而興起得  
無慕休烈揚顯光者耶汝厦用意遠矣嘉泰四年八月  
日

碑文

永豐縣旌忠廟碑

高宗皇帝中興之三年歲在己酉金人分道入寇江浙大擾十一月隆祐皇太后自洪上贛護衛將杜彥揚臯當時誤以世雄奏乃其字也道叛屠撫之崇仁縣遂犯吉之永豐知

縣事左承議郎宗室訓之字誨道素懷忠憤有為國捐軀之志至是率尉修職郎陳自仁拒戰境上分民兵為三一統賊後一據地利誘以羸卒賊遇伏而敗他盜蟻附鴟張尉死之侯力不支轉鬬入邪罵賊遇害年四十四賊視防守營柵歎服而去邑免焚蕩士民獲金不可



計人人德侯奉其柩葬太和縣盧源鄉又附祠城隍水  
早疾疫禱焉明年詔贈朝散郎加直秘閣官其後兩人  
自仁亦贈通直郎官一子同立傳國史久之二孫彥櫛  
彥權皆踐世科歷內外任使慶元五年彥櫛以九江郡  
丞卿擢省謁祠墓始從父老歐陽昌等得侯死所即邑  
東藥師院隙地創廟三間設侯及夫人喻氏像尉與享  
焉廊廡門閤嚴潔相稱以九月興工六年二月邑官致  
祭落其成郡守趙善鑣既助工費復上其事於漕漕雷

潑下樂安丞吳魯卿新淦主簿梁季安繼來覈實俱謂  
侯節義顯著禱祈輒驗實有功於民嘉泰元年太常擬  
賜廟額旌忠六月壬寅制曰可彥楠等請文刻麗牲之  
碑乃為作迎送祠歌以祝焉其詞曰忠死為神今前言  
孔彰我侯兵解今上征帝傍民懷德惠今姓名愈芳天  
子有命今典祀舊疆新宮翼翼今像設堂堂帝意若曰  
民不忘汝汝豈忘往其廟食從巫陽春秋致享禮有常  
牲牢潔肥奠椒觴坎坎伐鼓舞洋洋神具醉止欣樂康

時節謁帝奏祺祥雨暘以時豐稻粱厲鬼驅除絕寇攘  
恩江湯湯兮與神之績彌遠而彌長三年二月辛丑

在法神有功者初賜廟額次加侯爵此碑稱侯張  
本也初侯之亡安撫使朱丞相勝非檄太和上官  
泗州文學蕭環集民兵來邑定亂環因收恤侯家  
葬侯盧源以其子世崧娶侯長女後七年喻夫人  
卒遂合葬焉侯之孫間來展墓環姪孫登仕郎知  
節實為東道主廟成復為刻碑蓋其家素尚義云

文忠集卷六十

欽定四庫全書

文忠集卷六十一

平園續稿二十一

宋周必大撰

神道碑一

龍圖閣學士左通奉大夫致仕贈少師謚忠簡

張公

闡

神道碑

紹熙五年

紹興元年二月丙戌詔以多難未彌人才為急其復秘書省置官屬當是時高宗方馬上治天下乃肇復文館

收召名勝儲以待用君子是以知中興之必可興也時  
范丞相宗尹實當國而秦丞相檜初拜叅知政事逮十  
年秦雖專國柄然以與聞初議猶未敢進非其人惟  
永嘉張忠簡公以端醇脩潔用給事中林待聘薦召對  
召試入省凡五年同僚或自臺察驟用或由著作為左  
右史其下亦不失尚書郎而相國兄梓子熺又相繼為  
之長他人附麗不暇公獨介然其間秦知公久次喜論  
事一日微諷公謂當入臺公迎拒之坐是報罷間廢十

有五年了無愠色秦薨公亦不求知於人二十九年始以御史臺薦為檢法官班序更出正字下恂恂百僚底人為公太息會對便殿論事鯁挺擢吏部員外郎壽皇初開建王府高選講讀官朝論舉屬公改祠部郎中兼贊讀而直講則史丞相浩也三十二年六月己巳王為皇太子升少宗正兼右諭德俄內禪攝二冬卿未幾直講大用公雍容從臣之末泊如也隆興初元落權字歲中進長本部上方銳意恢復而在廷議論不一公每陳

正心誠意脩政事攘夷狄之說上亦虛懷聽納每事咨訪使公少卑之執政可立致會江淮都督府結局和議已成公堅求去上不能奪自壯至老大節蓋如此可謂始終全德矣公諱闡字大猷温州永嘉縣人曾祖恭祖積父贈中奉大夫忱皆積德樂施公幼夢人大書闡字曰以是名爾中奉異之力勉公學未冠由舍選貢京師中宣和六年進士第調嚴州兵曹掾兼治右獄州欲戮土豪付公鞫之公謂罪不至死卒謂如律人嘉其有守



建炎登極循脩職郎丁考憂紹興改元免喪以從政郎  
為虔州州學教授叅政李公回帥江西辟置幕中四年  
叅政席公益帥湖南又辟幹辦公事洞庭羣盜熾張公  
畫策造戰艦訓水軍賊勢以衰諸司交薦改秩吏部引  
歲月失通理沮之公求監南嶽廟以歸連教授鄂州台  
州既賜對首言金人歸我關中願固守以蔽巴蜀圖中  
原次論監司郡守舉官之弊又乞嚴禁遏糴濟江浙水  
患皆契上意命試學士院遂除秘書省正字輪對論三

事其一請廣人才任將相練士卒則徽宗梓宮可還母  
后淵聖可歸母專屈已和我使權不在我二曰臣比自  
溫歷處婺泱旬再值雨雹麥秀者偃桑萌者落盡恐懼  
修省以召和氣其三論官冗曰兵火後縣不滿千戶設  
官乃十餘人州不滿萬戶而官至百餘人場務及兵官  
卒十員無學校而置教官無軍士而置將領駐泊鈴轄  
之屬及員外置者不在焉昔漢光武併四百餘縣吏員  
十置其一唐憲宗用事李吉甫言省冗員八百吏千四

百漢唐中興宜以為法上獎諭曰非卿不聞此在職滿  
歲改左宣教郎十二年遷校書郎兼益王府教授公自  
以儲才之地無力可陳惟國家大利害可因事納忠時  
諸大將恃功邀爵賞有過則姑息又兵布於外而禁衛  
單寡公上疏極論之厥後稍進退諸將召諸道兵補三  
衙闕額往往符公言明年以秘書郎兼國史院檢討官  
諸通好高麗西夏訶北人之勢明詔大臣廣求人才上  
皆嘉納又明年駕幸秘書省新例遷一官自是免去踰

年主管台州崇道觀秩滿添差通判泉州代還改衢州  
未上省罷二十五年冬上躬攬萬幾起提舉兩浙路市  
舶居二年乃為臺屬升即闡入王府稍嚮於用三十一  
年四月御批雨傷蠶麥盜賊間發令侍從臺諫條具消  
弭之術公適輪對謂講和以來竭民力奉強敵人不堪  
命強遣中原歸正人怨恨日深監司郡守不按法貪賦  
州縣被害放積欠有名無實二稅先期追擾商賈苦於  
重征能革數弊災異消盜賊弭矣又言完顏亮積粟聚

兵意在南寇乞守要害防海道巴蜀淮襄不可無良將  
督視不可無大帥上曰卿言深中時病惟遣歸正人誓  
書所載卿未知耳已而亮果遣使持嫚書來朝廷始為  
戰守脩略如公策八月遷將作監是冬敵騎臨江公因  
轉對請增治江戍兵大脩諸郡之脩濟師京西淮東牽  
制金兵明年夏進宗正少卿壽皇登極擢權工部侍郎  
兼侍講賜服金紫以隨龍恩遷七官遂轉左通議大夫  
入謝言將以敗為捷冒受爵秩諸州廂禁軍因軍需鼓

譟希厚賞不可不正其罪上為次第施行金主死新主復求和朝廷議再遣使詔略曰敵人索舊禮從之則不忍屈不從邊患未已納中原歸正之人東南力不能給否則絕向化之心宰執侍從臺諫其詳議以聞公言選將練兵名分可正江淮授田遺民可招疊疊數百言是冬給禮侍從臺諫條具時務公上十事一曰強國勢二曰革苟且三曰重臺諫四曰明賞罰五曰信號令六曰抑奔競七曰嚴軍政八曰戢貪吏九曰節財用十曰禁科

欽當是時應詔數十人惟公與國子司業王十朋指陳  
實事斥言權倖無所回隱明日上名兩人對內殿大加  
稱賞賜酒食面授御書各一軸隆興元年正月真拜工  
部侍郎公奏臣去冬乞守禦兩淮陛下謂立春行之夏  
秋當畢脩今其時矣面陳三策移都督府於維揚增修  
淮上城郭優恤山水寨民兵及死事之家以勸來者上  
曰今江淮事盡付張浚朕倚之為長城會督府請受蕭  
琦等降上召問公公疾不能入奏請受其降俄報王帥

收復靈壁虹縣公慮大將李顥忠節宏淵深入無援奏  
乞益兵殿後已而王師果失利衆論遂歸罪於戰公奏  
陛下出師受降是也諸將違節度且無援而敗當矯前  
失安可遽沮銳氣上命益出御前器甲付諸軍親禮勞  
張公軍聲復振時數易臺諫公力言之會太白晝見詔  
近臣條闕政公謂比年災異數見去秋七月溫台颶風  
壞廬舍以萬計二浙飛蝗蔽野今歲夏秋雨淫水溢米  
直翔湧太陽薄蝕星緯復爾當思應以實不以文乃者



言路輕易出令不謹君子未進小人未退給禮條弊政而無所更革臧否監司守成規而無所升黜文具如此致變固宜至如近則荆襄江淮守禦缺然遠則蜀道連歲出師凋瘵已甚陛下方馳騁毬馬日引狼子野心之人周旋禁籙垂象安得不再三示警耶疏入上召公以擊毬非朕所好邊陲未靖欲便習鞍馬耳公因言真宗仁宗增置諫員今纔一二人非所以廣聰明上曰臺諫好名如某人但欲得直聲而去公曰唐德宗疑姜公輔

為賣直陸贄切諫願陛下深以為鑒上再三嘉獎金復  
求成上與公議公曰彼欲和畏我耶直欺我耳力陳六  
害不可許上曰朕意亦然姑隨宜應之上又記公賣直  
之語謂胡銓亦及此朕非拒諫者辨是非耳公曰聖度  
當如天奈何與臣下爭名上忻然曰卿言是也項之除  
權工部尚書兼侍讀十一月宰執奏今秋金國副元帥  
赫舍哩志寧以書論通好朝廷遣使臣盧仲賢報之所  
論三大事正國書歲幣如數皆定不疑惟唐鄧海泗未

決將遣王之望龍大淵通問而衆言紛紛不已乞以當  
和與否遣使與否禮數後先土疆取與大詢侍從臺諫  
擇其善者從之詔於後省限一日集議於是吏部尚書  
凌景夏戶部尚書韓仲通權吏部侍郎余時言刑部侍  
郎路彬同一議禮部侍郎黃中兵部侍郎金安節同一  
議侍御史周操右正言陳良翰為一議給事中錢周材  
起居舍人馬騏為一議起居郎胡銓監察御史尹穡閻  
安中各自言之其說人人不同公獨謂不與四州乃可

通和議論先定乃可遣使今彼為客我為主我以仁義撫天下彼以殘酷虐吾民觀金勢已衰何必先示以弱朝論韙之初上用真宗故事命經筵官二員遞宿學士院朝夕宣召商確古今語訪政事公入對尤教知無不言屢引疾乞閒上曰朕所以知外事皆賴尚書相從久忍言去耶二年四月公請益力上不得已除顯謨閣直學士提舉江州太平興國宮陞辭上問所欲言公奏許和則忘祖宗之仇棄四郡失中原心遣歸正人傷忠義之

氣惟陛下毋忘老臣平昔之言其指時事尤諄切上曰  
卿姑暫還鄉秋涼復召卿矣加賜金犀帶持許佩魚公  
既退賦詩云八請犯天顏今朝出漢關渾如倦飛鳥日  
暮傍巢還到家踰月而病以龍圖閣學士左通奉大夫  
致仕七月二十六日薨訃聞特贈端明殿學士恩數視  
簽書樞密院賻銀絹二百疋兩享年七十有四乾道元  
年十一月十四日葬本縣建牙鄉瞿溪之原中奉公墓  
側初公素樂其山水將歸老焉葬從公志也淳熙十年

特賜謚忠簡累贈少師娶盧氏先公八年卒贈越國夫人四子伯桂國學生早死仲梓朝奉大夫新知通州叔椿朝散大夫江西轉運判官季樛朝請郎主管建寧府武夷山冲佑觀一女嫁奉議郎兩浙轉運司主管文字盧珉孫煥承議郎新權通判平江府熒宣議郎充兩浙西路安撫司幹辦公事煥通仕郎燧承奉郎新建康府戶部大軍庫門熺文林郎新福州羅源縣主簿餘未命名孫女二人迪功郎新監行在省倉中界吳瑾從事郎

新臨江軍判官潘檜其壻也曾孫脩職郎新福州長溪  
縣主簿次尚幼公莊重出於天性誠信濟以學力在王  
邸讀資治通鑑至脩身治國必反復誦說壽皇每嘉納  
暇日賜禮和詩恩意綢繆人謂公必輔初政而公歸志  
浩然善類迄今以為恨平生行事悉筆於冊五十餘年  
不少廢文體粹然詩尤清遠鄉人子弟多求公紀其父  
兄行實諸子類成文集若干卷藩邸聖德事迹十卷經  
筵講義故事若干篇奏議若干卷並藏於家公之臺法

也某與館職間遇公朝士之家公徑趨下坐客頗不安予謂公郎秘書越二十年乃館中先進當序齒如例衆以為允公初貳冬官某忝起居郎追班從駕密踵公武情好孚洽今轉運君以書來諗云先君道同志合惟王十朋胡忠簡公銓王公嘗為行狀許志墓而不果胡公亦下世成遺者惟執事耳某不敢辭乃為銘曰

煌煌精金百鍊不變矯矯勁松歲寒乃見有美張公積



善自躬正直靖共一其初終紹興盛際公在館閣尊厥  
德性恥要人爵龍躍於淵翼之天飛政路砥如公背而  
馳上知公誠士服公識信道而行何徇何激官非不崇  
壽非不隆用有未盡人思無窮三溪釣徒公昔自謂樂  
哉斯丘尚愜公志

資政殿大學士贈銀青光祿大夫范公

成大神

道碑

慶元元年

吳郡范氏自文正公起孤童事仁宗皇帝當慶歷癸未

入參大政後百三十有六年公復參考孝宗皇帝政事維  
譜牒不通俱望高平派南陽之順陽蓋鴟夷子苗裔也  
今為郡之吳縣人公諱成大字至能曾祖澤贈太子少  
保妣昌元郡夫人夏氏祖師尹贈太子少傅妣咸安郡  
夫人陸氏咸寧郡夫人蔣氏考雱終左奉議郎秘書郎  
贈少師母秦國夫人蔡氏莆陽忠惠公之孫而潞忠烈  
公外孫也公在懷抱已識屏間字少師力教之年十二  
徧讀經史十四能文詞是歲秦國薨明年少師薨公焚

然哀慕十年不出竭力嫁二妹無科舉意欲買山無貲  
取唐人只在此山中之語自號此山居士又慕元魯山  
為人一字幼元生友御史王公彥光勉之曰子之先君  
期爾祿仕志可違乎因課以舉業遂中紹興二十四年  
進士第調徽州司戶叅軍歷三守李植潘莘洪文惠公  
李御下嚴獨霽威待公會遷提點坑冶辟公幹辦公事  
不就潘格郊赦不弛諸軍糧欠衆言紛起將校告急於公  
公徑為免符白守行之乃定洪公博洽精明每以訟牒

付公必問一牒幾人姓名云何公由此究心熟吏事洪  
公喜日與公商確古今常曰吾視君齒必至兩地其自  
愛用舉主陞從事郎三十二年入監行在太平惠民和  
劑局堂吏勾藥不獲以朝旨下所隸太府覓細故杖吏  
逞憾公白戶部侍郎汪公應辰杖太府吏已能大其官  
矣壽皇受禪命宰臣編類高宗聖政隆興元年四月以  
公為檢討官又兼勅令所近世局務無修書者人以公  
為宜詔百官條時弊公舉十事極論文具非所以為國

執政奇其才二年四月除樞密院編修官居數月自以銓格改左宣教郎時館職定員有詔公與王衍候闕召試十二月鄭升之不試先除牽聯併除公祕書正字公不可以試策而後就乾道元年三月升校書郎六月兼國史院編脩官十一月遷著作佐郎二年二月除尚書吏部員外郎言者以不先攝為起遷宰相曰著廷間擢左右史顧不可為郎耶九月言者罷乃主管台州崇道觀三年十二月起知處州陞對論力之所及有三一曰

日力寸陰是也二曰國力資用是也三曰人力思慮智術所及者是也三者有限今盡以虛文耗之公前應詔上封及試策反復論此至是方見上力以為言上曰卿能激昂如此朕當行之四年八月至郡松陽民爭役公曉之曰吾聞東陽縣有率錢助役者前婺守吳侯義之為易鄉名揭碑褒勸爾與之隣獨無愧乎民既感謝則推廣其制諭鄉人視貧富輸金買田擇信義之家掌其事儲歲入助當役者命曰義役仍許自第名次有司勿

預數月間人皆樂從一縣二十五都悉以辦告甲乙相  
推遠至二十年諸邑爭倣之處多山田梁天監中詹南  
二司馬作通濟堰於松陽遂昌之間激溪水四十里外  
溉田二十萬畝溪遠田高堰壞已五十年公尋故迹議  
伐大木橫壅溪流度水與田平即循溪疊石岸引水行  
其中置四十九閘以節啓閉上原用足乃及其中次及  
其下而堰可復議定官為雇工運石命其傍食利戶各  
發丁壯分畫界至以五年正月同日興工四月而成水

大至如初議適公被召躬往勞工老父驩呼曰堰成公  
忍去我耶公曰吾能經始安能保其無壞為立詹南廟  
作堰規刻石廟中畫給左右山林為脩堰備至今蒙其  
利公入對因及義役工大喜頒其法諸路公曰此可助  
法非以為法顧守令行之何如耳初工命宰相陳正獻  
公擇文士掌內制正獻薦知遂寧府張震及公至是上  
曰卿文學詞翰寧宜直禁林公懲前遷郎致謗懇辭退  
復告執政會上目疾不御朝久之內殿奏事上首及公



除目正獻道公意上曰不專在內制正要士人宿直脩  
顧問乃除禮部員外郎兼宗政殿說書上令更加清職  
遂兼國史院編脩官會從兄成象為工部郎官公援故  
事乞班其下從之內直數宣對嘗諭公朕治心養性以  
求知道公曰知道莫如堯舜禹湯文武周孔其靜而聖  
存心養性是也動而王治天下國家是也漢唐之君功  
業固有之道統則無傳焉上嘉獎數四十二月擢起居  
舍人兼侍講直前謝上曰卿閎深博約故有此除又兼

實錄院檢討官公奏獄案淹延當貸者多瘦死乞嚴程  
限於是自三省至大理皆定經由之日公先嘗論二浙  
丁錢至是詔遞減之乾道令以絹計贓估價頗輕論罪  
過重公奏承平時絹疋不及千錢而估價過倍紹興三  
年遞增五分為錢三千足今絹益貴當倍時值上驚曰  
是陷民深文也遂增為四千而刑輕矣後又奏勤政而  
不省其成否治具雖多何益古者君臣相戒既曰率作  
興事又曰屢省乃成二典之治如斯而已上喜曰卿言

切治道已退復召公曰為朕尋繹經傳與此論協者條  
上公即摘取書易左傳國語孟荀等書上之初大臣與  
上謀移侍衛馬軍屯金陵示將進取先遣使請祖宗陵  
寢河南故地又隆興再講和名體雖正失定受書之禮  
上常悔之六年五月遷公起居郎假資政殿大學士左  
太中大夫醴泉觀使兼侍讀丹陽郡開國公充金國祈  
請國信使為二事也上語公曰朕以卿器宇不羣親加  
選擇聞外議洵洵官屬皆憚行有諸公曰無故遣泛使

近於求釁不戮則執臣已立後仍區處家事為不還計  
心甚安之上曰朕不敗盟發兵何至害卿啗雪餐糴或  
有之不欲明言恐負卿耳國書專求陵寢而命公自及  
受書事公乞併載書中朝廷不從公遂行金遣吏部郎  
中田彥臯侍御史完顏溫迓客彥臯文儒深敬慕公至  
求巾幘傲之抵燕山公知彼法嚴附請不可達密草奏  
具言他日北使至欲令親王受書其詞云云懷之入覲  
初跪進國書陳誼忼慨金君臣方傾聽公隨奏曰兩朝

既為叔姪而受書之禮未稱昨嘗附完顏仲季若川等  
口陳久未得報臣有奏劄在此搢笏出而執之金主大  
駭厲聲謂其宣徽副使韓綱曰有請當語館伴此豈獻  
書啓事耶自來使者未嘗敢爾連呼綽起綱皇恐以笏  
來綽公公不為動再奏云奏不達歸必死寧死於此金  
主欲起左右掖之坐又厲聲云教拜了去綱復以笏抑  
公拜公跪如故金主曰何不拜公曰此奏得達當下殿  
百拜以謝金主乃令納館伴處公即袖下殿望殿上臣

僚往來紛然後聞太子欲殺公其兄越王不可而止頃之引見如常儀即歸館伴果宣旨取奏去是日綱仲宴謂公早來殿上甚忠勤皇帝嘉歎云可以激勵兩朝臣子後數日朝辭金主令其臣傳諭云盟好已闕

汝國乃以帛書密與夏國任德敬結納此何理也公答以界外奸細偽為之俄館伴持蜀中蠟書來指印文示公公曰御寶可偽况印乎德敬者夏王外祖號任令公再世用事欲篡其國事敗族誅而四川宣撫司嘗與通

問為夏人所獲致之彼國云十月公還金主答書有曰  
抑聞附請之辭欲變受書之禮出於率易要以必從上  
於是知公竭節盡忠獎勞之餘有終始保全語除中書  
舍人同脩國史及實錄院同脩撰賜紫章服副使以下  
皆遷階兩官惟公不預蓋大臣不樂公嘗言其輕信西  
夏也上勵精政事患風俗萎靡書寫實政論賜輔臣公  
講禮記天子不合圍諸侯不掩羣上曰此成湯祝網意  
也公遂奏德莫大於好生陛下得之矣乃者御書政論

意在飭紀綱振積弊而近日大理議刑遞加一等此非以嚴致平乃酷也上大喜曰卿知言聞臨安已觀望行事矣講退侍講張君拭謂公深得納約自牖之義右史莫君濟曰當書之記注後數日公進故事復申其說自公使北狂生上書迎合恢復事補官十餘人公奏倖門不可開繼此臣必繳奏上曰誠然書已滿屋朕皆弗省公每事正抹大率類此七年以知閣門事兼樞密都承旨張說簽書院事公當制知空言不可回明日袖詞頭



納上前且曰閣門官日日引班驟寘二府正如州郡以  
典謁吏為倖貳觀聽謂何明日說罷後月餘公求去上  
曰卿言引班事甚當朕方聽言納諫乃欲去耶公自是  
數有繳奏會召宋貺公又論之章不下尋除集英殿脩  
撰知靜江府廣西經畧安撫使明年春說竟拜簽樞九  
年公始赴鎮廣西荒遠窘匱承平時仰湖南北及封樁  
錢七十餘萬緡裨歲計此外惟恃鹽貨其法屢變大要  
官關為便建炎後中原士族富家避地輻湊嘗一行客

販其後客皆北歸隣道歲給亦停稍許折苗招糴旋以  
病民而罷諸郡專藉運鹽之利漕司取十六以其四充  
郡計已復盡取之於是屬州有增價抑配之弊詔復行  
鈔鹽漕司拘鈔錢均給所部而錢不時至守令束手無  
措極邊如邕州至經年無吏俸禁軍逃亡不捕公入境  
曰利害有大於此乎日夜討論連奏䟽數千言大畧謂  
法久或弊掾之在人誠能裁漕司強取之以寬郡縣則  
科抑可禁不在改法上亟從之後數年廣州一鹽商上

書乞復客販吏部侍郎詹君儀之以為然宰相入其說  
請下詔示必行大出朝廷錢銀助之多以為非屢下有  
司議皆謂公前疏不可易久之卒如其舊交趾間進馴  
象紹興二十六年有大僚為帥自詣驛禮其使至是遣  
尹子思來公曰吾經畧諸蠻陪臣安得亢禮受其庭叅  
而擣之遂為定制舊法馬以四尺三寸為限詔加四寸  
已上公謂互市四十年不宜驟改論奏再三仍條馬政  
革弊事皆報有沿邊巡檢常恭者誘南丹酋莫延甚開

路市馬直達師司自以為功張說猶在樞庭引恭見上  
詔委李宗彥措置馬事公奏南丹越宜州已非法今併  
舍師司邊防壞矣疏恭罪惡密遣人擒以歸會說去位  
流恭江州公以溪洞徭人出沒不時請選官團結省民  
毋得外交寇至勿俟官兵徑禦之次及熟徭在省地者  
亦為保伍明開博易之路毋得私易又遣人深入蠻境  
諭以約束自是無敢犯法興安縣界盜傷人公密設方  
畧掩捕之適中秋同諸司泛舟賞月命取大卮酌酒置

案間提刑鄭丙問故公笑曰欲飲至爾俄岸上謹譟乃  
將官沙世堅執賊首來即以卮酒飲之諸司駭服瘴鄉  
多旅樞公擇城北坑治故墟為塚瘞之揭名氏於傍微  
者別為二大塚凡仕族落南使自言給歸資至今以為  
法淳熙元年十月除敷文閣待制四川制置使知成都  
府稍鑿夔峽山路以避湍險人以為便會復置宣撫使  
以命樞臣改公成都路制置使未幾廢宣撫使公復專  
四路之寄初及境言吐蕃南詔昔為唐患今幸瓜分西

南無警二百年近者雅州碉門蠻入寇敗官軍乾道九年吐蕃青羗兩犯黎州而奴兒結蕃列等尤桀黠輕視中國臣當內教將兵外修堡寨仍講明寨丁教閱團結之法使人自為戰三者非闕不可上手札獎勵賜度牒錢四十萬緡公日夜閱士製器甲督邊郡次第行之時摘兵赴師司按其精粗以黎為要地奏置路分都監增五寨籍少壯五千為戰兵經理歲餘凡吐蕃擾邊徑路十有八悉築堡置戍奴兒結借諸部兵二千闕安靜寨

公發飛山軍千人赴之料其三日必遁戒勿與爭已而果然有白水寨王文才私取蠻女常導之寇邊公重賞檄羣蠻使相疑貳俄蕃牙擒文才以獻公命即黎州教場斬之兵威大震於是專意恤民矣初蜀之財用止以贍蜀自屯大兵始竭民力公私俱困公畧計成都在城建炎三年酒課歲纔四萬緡有奇後增十倍縣鎮酒稅場店民戶買撲課利總十五萬有奇後累至四十萬他郡可知即具以聞詔歲減四十八萬緡公隨額重輕躬

為裁定蜀人呼舞即寺觀為感恩祝聖道場公後言和  
糴之害凡西兵十萬歲用米一百四十七萬斛充買省  
計及營田之外闕五十二萬斛括興元階成西和鳳文  
龍等州民戶家業而均科之每石予錢引四道有半其  
二分折茶實給三引耗費斛面不與焉詔與提領李繁  
議繁密計本所饋遺乾沒歲約百萬隱而不言獨乞朝  
廷降本招糴執政怒詔公劾繁違制不同議公遣人語  
繁繁感懼始出羨數是歲遂以此錢所在招糴其後上



疑歲歉或妨闕公謂脫不得已權科一年歲豐如故不  
猶愈於常擾民乎上曰善令每歲降指揮而科糴遂止  
文州蕃部間擾邊公奏乞預為文告岨強者討擊之善  
良者撫摩之使知畏慕不可專示弱啟侮上以公深知  
事體即日施行蜀用陝西舊料簡強壯民丁三萬寓之  
於農號曰義士以待緩急歲久監司郡守多雜役之都  
統司又令守關隘烽燧且乞與大軍更戍公力言其不  
可詔遵舊法諸路提刑歲俟朝命疎決詔到率以秋公

請五月舉行解試取士以四月五日鎖院後十日引試  
公請避盛暑逋先一月皆著為令高宗慶壽赦舉引年  
致仕而才力不衰者公奏名士樊漢廣年五十九孫松  
壽六十六先已納祿尤宜旌異詔令赴闕二人俱不至  
遂除職賜服蜀士歸心焉凡人才可用者公悉羅致之  
幕下用其所長不以小節拘之其傑然者則露章以薦  
往往光顯於朝或至貳府三年春公大病求歸上令先  
進敷文閣直學士明日乃下詔命公列上兵民十五事

上曰范某已病尚為國遠慮可趣其來公疾愈而行送客數百里不忍別後公謝病吳門往來者伺候謁舍或經月必一見乃去其得士心如此十一月入對除權禮部尚書賜上方珍劑五年正月知貢舉開院侍御史奉詔劄封吏承例牒拆號官而不云何官御史疑薄已有後言公尋兼直學士院四月以中大夫參知政事又權監脩國史日歷纔兩月前御史亟論公公即出門明日宣押奏事引咎而已上曰朕不忘卿數月訊至卿家矣

除資政殿學士知婺州公請以本官奉祠詔如所乞提  
舉臨安府洞霄宮九月果有使來傳詔撫問密賜累珠  
金鼎金盒寶香其中六年二月魏王薨於明州起公代  
之兼沿海制置使公未復職過闕依前執政例中使郊  
勞賜銀盒茶藥仍許服毬文帶特御後殿引見賜茶上  
曰蜀人思歸如慈親故付卿以海道公奏張津伯圭魏  
王皆國懿親時節奉海物於兩宮臣外朝臣也不敢效  
尤上命停貢而罷進奉局又乞擢閣魏王移用諸司錢

數萬緡寬民力詔除之七年二月除端明殿學士三月  
改帥江東兼行宮留守奏事畢陞辭詔明日辭選德殿  
近例賜宰執酒止傳觴至是特設几開宴酒三行命侍  
過西小軒曰此朕清坐處也再坐上曰勸卿一杯且有  
以為侑公飲訖二內侍捧繰素來上有石湖二大字御  
墨尚濕公拜賜奉觴進謝上為滿引復袖御書蘓軾詩  
一軸以賜自未至酉乃罷石湖在平江盤門西南十里  
蓋太湖之派范蠡所從入五湖者始吳夫差築姑蘓前

後臺相距半里為城三重宴遊忘歸其前有溪今號越來溪勾踐由來攻吳瀕溪築城與吳人夾水相持遺址儼然公高下為亭觀植花竹蓮芰湖山勝絕繪圖以傳至是携宸奎過家刻之四月開府金陵適歲旱公招徠商賈捐閣夏稅請於上得軍儲二十萬石賑饑民苗額十七萬斛是年蠲三之二而五邑受粟總四萬五千四百餘戶無流徙者盜發柴溝去城二十里又劫江賊徐五稱靜江大將軍公皆設策捕獲在鎮二年以餘財代

輸下戶秋苗及丁錢一年九年公以積勤浸苦頭眩自  
夏徂秋五上章求閒上不得已進資政殿學士再領洞  
霄里居七年十六年十一日起知福州引疾固辭詔令  
奏事又辭上先遣醫官張廣卿傳旨灼艾既對勞公曰卿  
南至桂廣北使幽燕西入巴蜀東薄鄞海可謂賢勞宜其  
多疾袖丹砂以賜時皇太子參決庶務公得見東宮坐  
論治道移時太子諭公不敢暇逸日惟讀書作字公曰  
石湖已拜宸翰有壽櫟堂願得寶書太子欣然曰是莊

子櫟社事耶公既出關上復賜藥甚厚至家又遣使賜御書蘓轍詩二首太子亦送壽櫟堂三大字俄壽皇內禪公行至婺州以腰疾力請奉祠從之壽康皇帝初政特詔求言公疏乞述重華以廣孝治執仁術以守家法堅國體以定規模節經費以蘓民力精覘謀以應事機審選任以求將材脩堡障以固西南議鹽筴以安二廣嚴錢禁以權官會廣屯田以實邊儲皆當世要務紹熙三年加資政大學士知太平州公辭數回優詔不允下



車踰月幼女將有行而逝公追悼切至遂請納祿復得  
洞霄而歸先以石湖稍遠不能日涉即城居之南別營  
一園閱杜光庭神仙傳記胡六子自崑山關海至范村  
遇陶朱公事大喜曰此吾里吾宗故事不可失也題曰  
范村刻兩朝賜書於堂上榜曰重奎其北又葺古桃花  
塢往來其間四年九月公疾病語門人曰吾本不待年  
告老今不濟矣亟為我剡奏詔下而公以是月五日薨  
積官至通議大夫爵自吳縣開國男累封吳郡公食邑

三千二百戶實封一百戶享年六十有八遣使奏聞贈銀青光祿大夫自公曾祖葬吳縣至德鄉上沙之赤山少師嘗戒子姪他日葬我母遠先塋後葬稍南小丘公嘗營壽藏百步間以十二月十三日歸窆妻和義郡夫人魏氏前公幾月薨至祔焉夫人承直郎信臣女紹興參知政事敏肅公之猶子敏肅知公深一見以遠大期之二子萃承務郎茲承奉郎女長適從事郎監行在車輅院張蒙次封孺人即沒於當塗者公天性孝友少師


工部如嚴師愛二弟教而撫之待成績尤至今為朝請  
郎通判建康府成已前卒郊恩官羣從弟姪五人歷典  
名藩所至禮賢下士仁民愛物凡可興利除害不顧難  
易必為之樂善不厭於同僚舊友喜道其所長不欲聞  
人過去思遺愛所在歌舞之公天資俊明輔以博學文  
章瞻麗清逸自成一家尤工詩大篇短章傳播四方初  
倣王筠一官一集後自哀次為石湖集一百三十六卷  
別著吳郡志五十卷使北有攬轡錄入粵有驂鸞錄桂

海虞衡志出蜀有吳船錄各一卷公蔡氏所自出故書  
法兼真行草之妙人爭藏之壽皇尤愛賞相與極論  
古今翰墨數被賜予因北使為館伴王侍郎拒詳言公  
奉使時事益簡上心以公羸疾賜藥無虛歲主口授導引  
脩養秘訣親厚非羣臣比輔政既日淺每出鎮輒以病  
免故雖大用而未盡議者惜焉某與公齊年御史王公  
予外舅也以是與公善壬辰春自春官去朝過平江遊  
城西諸山公訪予靈巖同宿石湖望夜小舟共載湖心

風露浩然嘗有六十掛冠之約其後或同朝或相與於外每以未踐言為恨今公云亡二子以主管吏部架閣文字龔頤正行狀來請銘其敢以老詩辭銘曰

應龍將翔涵以雲霧聖君勃興賚以丞輔伊昔重華治謹厥度洵美范公心期致主皇初好文公筆燕許皇念典學公業馬褚皇資專對公節騫武皇命征鎮公猷方虎他人偏長公力交舉經營四方不遑啓處衮職有闕帝命公補纔六浹旬誰實公沮豈無藩維每以疾阻時

非不逢施迄未普刻銘幽墟尚詔終古



文忠集卷六十一

欽定四庫全書

集部

文忠集卷六十三

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>黃嵩齡

欽定四庫全書

文忠集卷六十二

平園續稿二十二

宋 周必大 撰

神道碑二

中散大夫賜紫金魚袋周公

樞

神道碑

慶元二年

公諱樞字仲應姓周氏世為濟南臨邑人自公高祖徙家縣之曲隄曾祖登大理寺丞贈通議大夫祖點治平四年進士終左朝議大夫贈通議大夫父淵右通直郎



贈紫金光祿大夫公少穎悟長以經術入太學嘗與太常丞吳棫同舍棫以憂去舉篋鑰付公曰有用任君啟之比吳免喪封識如故母趙氏濮安懿王之姪孫以郊恩奏公承節郎連丁內外艱躬負土營窆服除試換迪功郎調單州刑曹數與守爭疑獄靖康二年州募僚屬奉表勸進康王往往移疾公獨請行建炎初檄趣淮浙綱運展轉兵間至山陽直劇賊攻城郡就委公守禦卒以無虞士民德之請公行郡事公引劍誓不可乃止

思循脩職郎改太平州獄掾疏理繫囚時具藥餌三年  
無痠死者以從政郎監臨安府都稅院府尹才之命攝  
錢塘縣時北邊罷兵營繕日興錢唐當治郊壇籍田秘  
書省不勞而辨賞循承直郎諸司交薦紹興十六年改  
右宣教郎知常州宜興丞久之易宰平江之常熟治劇  
沛然有餘力十九年郊恩賜緋魚袋轉通直郎知紹興  
府上虞縣積勞遷朝奉郎俄監鎮江府權貨務都茶場  
累賞轉朝請大夫通判建康府帥方侍郎滋史侍郎正

志舉府事委公轉運韓尚書元吉趙少卿彥端選公權  
知廣德軍乾道三年也最後葉丞相衡總領財賦以公  
名聞召赴都堂審察擢知撫州與奏事稱旨會臣僚言  
郡守年七十者闕宮觀三省類十一人姓名以進詔特  
留三人公與李衡柳楹也侍御史李處全又薦公風力  
可治煩於是改知吉州七年賜服金紫吉大州事十倍  
他郡公處之整暇造二漕不咸甲將以治辦薦公乙怒  
反加摭撫公乃求主管台州崇道觀而去起為沿海制

置司叅議官叅政范公成大守四明雅器公軍事多諮  
焉秩滿主管武夷山冲佑觀遂致其仕疊遇德壽宮慶  
壽恩轉中散大夫公之守吉也某自禮部侍郎奉祠歸  
里公年七十有五每燕集達旦無倦色予猶未五十莫  
能陪也其後十五年公年九十携其兒孫訪予於相府  
飲食笑語如初寓居秀州海鹽縣既歸值夏秋暑甚得  
瘡痢疾整衣危坐而逝實淳熙十四年十一月四日公  
詳練通敏外和而內有守不可干以私善筆札喜談論

隆親急故無不得其權心娶安陽王氏封宜人供備庫使知恩州贈少師諱復之孫朝請大夫開封府司刑曹事諱觀之季女而某先妣秦國夫人同堂妹也勤儉有容德歸公五十四年內助為多先八年卒公因卜地於縣之永安湖西石帆山葬焉至是乃同穴蓋明年二月六日也二子廸功郎湖州司理參軍大年前卒季子從事郎徽州歙縣主簿億年廉謹世其家二女長適張調再適文林郎福州錄事叅軍俞世昌次適鄉貢進士本曇

孫男六人升南華孚頤正師中鼎新充吉女六人曾孫男四人女三人億年數年請銘不得而辭銘曰

儒雅裊其身公勤達於政不以才能加諸人不以嗜慾伐其性一謙有終吉五福考終命之二者於公信而證矣

中大夫贈特進蔡公

仲

神道碑

紹興二年

仁宗朝蔡忠惠公昌言直道文章政事廷臣鮮出其右當是時由侍從登二府者非歷言路則入翰林非尹開

封則領三司四者公徧為之垂大用而仁宗上僊犒軍  
賚予修奉紹陵橫賞錯出公處之益閒暇中外歎服會  
間言請去未幾即世士大夫至今以為恨其葬也惟幼  
子旻在仕至宣義郎開封府上曹贈少傅先娶賈氏翰  
林侍讀學士黜之女追封吳國夫人再娶潞國文忠烈  
公之女追封越國夫人是生三子長直龍圖閣佖次徽  
猷閣待制佖季特進也諱仲字仲道三歲而孤鞠於文  
氏稍長與待制從龍圖受業名聲日昭時號三蔡釋褐

將仕郎辟雍正出為京東提舉學事司幹當公事入  
太學辟雍皆為博士銓法改宣德郎調知維州北海縣  
徙江淮發運司幹當公事通判徐州禁卒謀夜半舉火  
作亂公微聞之部分營密為之備仍戒譙樓故緩更籌  
戊夜方擊三鼓卒舉火則黎明既愆期衆無應者相率  
逃去追捕盡擒之微公一郡殆矣會金人陷汴都康王  
開大元帥府公上謁軍門遂留幕下王即位廵淮甸及  
南渡公皆從行為頃遯官數被嘉獎命為張循王神武



右軍叅贊軍事出奇應變與敵戰多勝方張守忠轉掠江浙間公招以書皆來降蓋公嘗挺身入賊壘開心見誠人故信之知楚州趙立公倅徐時部曲也自闕專治兵以郡印遜公朝廷命公通判州事公力辭改通判真州冬大雪火焚千餘家老稚啼號填道公處以官舍寺觀又發常平米賑給守不可公自任責上書待罪詔釋之擢知滁州真民挽留曰非吾父吾屬死矣至滁幾年秦丞相當國知公與舊相趙忠簡公副樞王敏節公厚

罷郡主管台州崇道觀紹興九年金人歸我河南起知  
徐州公受命亟行金尋渝盟改知德安府又改知和州  
再求祠以歸久之為浙東安撫使司叅謀官秩滿復提  
舉崇道觀公負文武器畧善騎射力挽二石弓見謂時  
才而事機不契退居常州浮湛里閭四奉外祠未始以  
窮達介意喜為歌詩字畫得家法性通音律每與賓客  
酒酣慷慨浩歌長嘯遂至於老輕財重義濟人之急家  
無餘貲遇大禮官伯氏二孫載咸報教育之德人益賢

之二十六年十月庚寅以疾卒明年正月壬辰葬武進縣懷德南鄉潭墅之原享年六十有九積官左中大夫賜服金紫爵建寧縣開國男食邑三百戶累贈特進娶刑部侍郎商守拙之女追封濟南郡夫人四子長湍承事郎通判鎮江府後公二十年卒次洸試戶部尚書又後四年卒次流從事郎監潭州南嶽廟次渙承直郎新貴州軍事推官六女武翼郎知楚州辛堅之從政郎徽州黥縣令祖嗣昌通直郎知明州奉化縣向士邁朝奉

大夫知潮州潘淵明承議郎主管台州崇道觀張克成  
進士劉澂其壻也孫九人戡今為中大夫充右文殿修  
撰知隆興府戢朝奉大夫通判潭州幾承議郎知臨安府  
富陽縣藏承事郎戢奉議郎新兩浙轉運司幹辦公事  
戢戎未仕武藏早卒曾孫十人康文林郎監建康府提  
領戶部贍軍酒庫庸承事郎新監淮西總領所惠民局  
唐承事郎新監鎮江府大軍倉廩將仕郎廌庾餘未名  
按蔡氏世家興化軍之仙遊縣自公曾祖贈刑部侍郎

琇而上隱居不耀忠惠公拔起田間未冠擢甲科其弟  
高亦中景祐進士第不幸早世歐陽文忠公銘而悲之  
逮崇寧三年龍圖廷試第一宰相京舊通譜牒請降第  
二大觀三年政和五年待制與公相繼登科自以家世  
名儒而龍圖及從元祐諸公遊恥附宗袞常遠絕之因  
星變䟽宰相非其人坐責監當其後秦丞相與公有同  
舍同年之好復不肯曲意干進秦薨而公亦病矣高宗  
一日與知臨安府榮叟歷數霸府舊人問公安在叟以

公病棘奏上嗟惜久之其三世隱顯本末如此蓋忠惠  
公蓄德燾後施及諸孫暨公善積慶餘克有良子歷官  
八坐被遇孝宗追謚曾門振宣幽光再傳至右文優踐  
崇秩出入三朝由戶部侍郎分鎮江西蔡氏之興殆未艾  
也公既沒四十年而墓道之碑未刻右文君以予周行  
舊交使來請銘乃為銘曰

天之於人報有可必凡後之昌繇身之誦惟忠惠公當  
用而抑肆其三孫競爽鼎立季也允文而又武力曾是

國器胡寧家食遺子若孫嗇取豐積勿替引之永世無  
數

龍圖閣學士宣奉大夫贈特進程公

大昌神道

碑 慶元三年

故吏部尚書程公以龍圖閣學士就第踰年而卒其子  
準等持兵部侍郎楊公大法所狀行實屬某以銘予與  
公同年進士數嘗同僚厚我莫如公知公莫如我其何  
敢辭恭惟孝宗皇帝聖學高妙勵精政事尤有知人之

明惟公歷兩省六曹以該洽直諒見知相與論道統評  
政體在廷少比公亦忘身殉國思為朝廷植悠久之計  
其在外則心乎愛民長慮却顧未嘗便文自營士大夫  
皆以不大用為恨及事壽康皇帝興念舊僚疊加恩禮  
而左右乏裏言公亦老矣無意仕進得謝於家盡發所  
蘊著書立言啓迪後生蓋其自幼至老機祥卜祝無所  
信玩好技藝無所嗜惟通經評史考古驗今一事未詳  
一理未窮弗措也其始終大槩如此若乃爵里議論則



可一二數矣公諱大昌字泰之按程氏其先出自重黎  
周有休父封於程地在關中子孫散居西北有開府儀  
同三司靈洗者效節蕭梁著功於陳封忠壯公南史以  
關安為新海寧人即今徽州休寧也厥後或北歸或遂  
留故公為休寧曾祖晟娶洪氏祖士彥娶金氏父畎累  
贈正奉大夫娶妣淑人程氏世積善尚義孜孜教子至  
公穎悟殊常兒十歲能為文紹興癸亥重立太學年甫  
冠矣一試即預選學官爭為延譽二十一年登進士第

一左迪功郎主吳縣簿子正奉憂服除獻文於朝宰府  
奇之二十六年除太平州教授明年召為太學正三十  
年詔館職必試乃除初召朱熙載等再召劉儀鳳等皆  
辭上命宰執擇人不許辭以公應詔仍諭上旨遂除秘  
書省正字改左宣教郎三十二年六月孝宗受禪擢著  
作佐郎初政銳意事功命四出貴近或預密議公因  
輪對及之尋命百官條弊事公又極言漢石顯知元帝  
信已先請夜開宮門之詔他日故投夜還稱詔啓闕或

言顯矯制帝笑以前詔示之自是顯真矯制人不復言  
國朝命令必由三省防此弊也請自今被御前直降文  
書皆由省審奏乃得行以合祖宗之規以防石顯之奸  
又論去歲完顏亮入寇無一士死守而兵將至今策勲  
未已惟李寶提膠西虞允文戰采石寶屠亮之階今寶  
罷兵允文守變此公論所不平也上韙其言三皇子就  
傳遴擇官僚九月以公為尚書駕部員外郎兼叅王府  
贊讀又兼兵部郎官隆興元年兼慶王府直講十二月

丁母憂乾道二年春服闋召為考功員外郎六月復兼  
恭邸贊讀八月選國子司業三年十二月兼權禮部侍郎  
一時文柄舉屬公其成就人才不可計凡今老師宿儒  
多公門生也五年正月兼權直學士院宣對選德殿上  
曰朕治道不進如何公知上志在恢復迎合者多即奏  
陛下勤儉過古帝王金人自通和知尊中國不可謂無  
效但當求賢納諫使政事日脩則大有為之業在其中  
不必用迎合之言求奇策以幸速成又言築城太多緩

急何人可守臣謂設險莫如練卒練卒則在選將上深  
然之後數日再召對上曰卿前言朕儉是也獨病風俗  
太奢用度不足今早與大臣議立法以止之公奏居室  
衣服吉凶之禮皆由著令要在上之人持久以化之耳  
上又問卿更有何事為朕言之公曰事有大小有先後  
今四方獄案必經聖覽大臣因是亦困闕何暇議大  
事急先務乎往陛下嘗增左右司為四員若漸復減員  
分以委之中書之務清矣後數年迄如公言八月除直

龍圖閣江東轉運副使蓋公求試民事故以鄉部寵之  
公引嫌改浙東提點刑獄越帥多大僚適歲豐酒稅溢  
額漕臺不敢問乘公攝帥遣其屬挾朝命括羨財且將  
增額公力拒之曰某寧罪去不可增也越人迄今德公  
七年復徙江東運副詔勿引嫌公猶不自安踰年乞祠  
就徙江西路公曰可以興利除害行吾志矣九年歲儉  
出錢十餘萬緡代輸贛吉臨江南安四郡五等夏稅折  
帛遏飢民為盜之原又遷吉州造船塲於臺治以省費

革弊凡吉舊欠皆捐之清江縣有破坑桐塘兩堰堤江  
四十里護田三千七百頃民居陸地又三百頃堰壞四  
十年歲罹水患公力復其舊又奏漕臣遇代積累欠數  
病州縣乞行蠲削淳熙元年各詔可凡乾道七年八年  
諸路欠稅賦丁役及他錢物併除之由公一言上恩及  
天下矣歲滿再任進告不下宰執問其故上曰程大昌  
職事脩舉自合加職乃陞秘閣脩撰二年四月召為秘  
書少監九月兼權中書舍人六和塔僧以鎮潮為功求

內降給賜所置田產仍免科徭公奏二稅外和預買折  
帛正額額外科借皆科也保正長身丁雜役皆徭也僧  
寺既違法置田復移科徭於民奈何許之況自紹興二  
十二年脩塔之後潮果其不齧岸乎御前置忠銳忠武  
軍以浙西路鈐轄李師古兼統制帶御器械闕世明兼  
訓練援例增請給公執不可其命俱寢俄兼崇政院說  
書三年四月除權刑部侍郎升侍講五月兼國子祭酒  
公言辟以止辟未聞縱有罪為仁也今四方讞獄例擬



貸死臣謂有司當守法人主察其可貸則貸之如此則法伸乎下仁歸乎上矣上以為然舊法宰執初除轉廳皆有給賜減半其後太尉使相三少而上往往取旨視樞密使都官用例浸失法意公請自侍從而執政自執政而相則為初除法當全與餘為轉廳皆減其半遂為定制上知公特立不避怨滋欲用之四年八月兼給事中江陵統制官率達原縱部曲毆百姓守帥辛棄疾謂曲在軍人坐徙豫章公極論不可上曰朕治軍民一體

逢原已削兩官降本軍副將矣康與之在紹興時以談  
諧進後坐事長流廣南至是有與為地刊除舊犯還其  
資歷公封還勅黃上喜曰待遷擢卿其益盡心毋避忌  
十月落權字五年正月同知禮部貢舉御製原道辨尋  
易名三教諭獨公與聞之六月進吏部右侍郎兼同修  
國史舊小使臣注令尉若監鎮兼烟火者驗老病而已  
公以其親民面令讀律具闕其大指不通者輒罷遣八  
月兼權尚書六年夏正除權吏部尚書公遇事啓請知

無不言如論軍中強壯子弟及西北伉健之人不可輕聽離軍禁衛不以膂力進今率三年輒補外官用違所長宜留寘三衙又欲酌紹興舊制命諸軍挽強轉資稍示勸誘又請究歸正偽冒裁減添差以寬州郡面奏堂白累萬餘言會舉行中外更迭之制公力請郡是冬除敷文閣直學士知泉州陞辭上諭曰凡有見悉奏來自南渡後泉為台信建昌邵武四郡代輸銀二萬二千兩諸縣並緣苛歛預借公條便民事具言本末有司待之

未下明年首為民代輸一年且乞禁絕後日預借又蠲  
前歲秋苗之未輸者八年春汀賊沈師作過詔併勅其  
徒公請罪止渠魁赦其脅從仍許徒中相糺可使亡命  
解散不然數州據亂是堅其附賊也宰相然公言奏行  
之是冬沈師獨興死黨竄伏漳州山谷間距城百餘里  
州有左翼軍戍將蕭統領者卷甲赴之逮夜力疲搏賊  
不勝死焉閩中大震漕檄左翼統制裴師武出兵師武  
置司在泉謂帥符未下不敢擅興公手書趣之曰事急

矣

闕

如帥責君可持吾書自解又取前得釋脅從之旨

散榜以間其黨師武至漳羣情頓安捕獲謀者十餘曹  
皆積藏兵器謀刻日縱火為賊內應徵公先事從權趣  
師武行漳且屬矣太守劉立義郡人今左司郎中鄭公  
顯馳書謝公曰城邑獲全公之賜也終更提舉江州太  
平興國宮十三年秋起知建寧府十四年復提舉南京  
鴻慶宮自公為郎首侍壽康於王邸多所寵益其後間  
謁東宮必款語移時嘗用家人禮許見今上及公主親

取寶器酌酒飲公受禪之初與宮僚一等推恩紹熙元  
年加寶文閣直學士旋知明州示將復用遽以祠歸四  
年超進龍圖閣直學士明年請老進本閣學士致仕皆  
非常典也慶元改元十一月甲申以疾不起享年七十  
三積官先奉大夫爵新安郡開國公食邑二千一百戶  
食實封一百戶贈特進公自宦遊去鄉里樂吳興溪山  
之勝而卜居焉晚得安吉縣梅谿鄉邱閣山規營塋域  
未成而卒淑人陳氏公母之從兄女生百日值方臘亂

父母携匿谷中祝曰兒若貴勿啼自是悄然既長歸公  
事舅姑以孝聞生諸子躬自鞠育公嗜書未嘗省家事  
賓祭孔時淑人力也年七十六遭公喪謂諸子曰吾得  
從而父足矣病不服藥後公四十七日安然而逝遂合  
葬焉二年四月辛酉也四男準朝散郎新通判太平州  
本早世早朝奉郎知上元縣覃宣教新浙西茶鹽司幹  
辦公事三女適承直郎監行在文思院都門鄭汝止次  
適奉議郎新知湖州武康縣丁大聲季早亡孫三人端

復登仕郎端節端履以遺澤補官女三人公有文集若干卷別著禹貢論五十二篇辨江河淮濟漢弱水黑水甚詳凡諸儒捨經泥傳注失禹本旨者一皆正之又為山川地里圖端明殿學士汪公應辰博洽重許可讀之大歎服謂不可及公在講筵遂以進御天語嘉獎令行於世別有演蕃露六卷攷古編易老通言易原雍錄四書各十卷北邊脩對六卷書譜二十卷取五十八篇互相發明篇為一論扶隱正謫尤有功於學者嗚呼公可



謂博學篤志者矣銘曰

浩浩千古孰知其津擾擾萬生孰致其身偉歟程公絕  
類離倫氣以直養業以勤精士之指南國之實臣其在  
兩禁昌言復君使於四方仁心庇民胡不弼諧迄其經  
綸歸而著書極道之貞既沒言立庶幾不泯自歎而湖  
筆自於今有式新阡尚考斯銘

文忠集卷六十二